

研鍊金匱叢集

二

繡鍊金盃叢集

第二集

新學
知學
PDG

中華民國十七年十月出版

版權
所有

繡鐵盒叢集

集之第二 (全一冊)

定價

每本大洋伍角
外埠酌加郵費匯費

著者

螺陽賀仲禹

發行者

廈門新民書社
鼓浪嶼聖教書局
閩南職業學校

印刷者

閩南職業學校

序一

余友賀君仙舫從事教育有年近將哀集歷年作品刊行問世徵序於余余不文惡能序君文即勉強爲之亦惡能於君文之價值有所增益以余所知君之爲文率多隨事酬應初非刻意爲之有蹟於古作者之意但隨事隨時信筆所之發爲詩文如釋迦說法青蓮湧現如一莖草化丈六金身於民生日用中指示道德之指歸於布帛菽粟中導衍文化之源泉在君爲游戲三昧而出其緒餘足以爲後進之師資青年之指導如君者實吾國現代教育界所急須之人才此一叢集初不必論其於古作者何如其足以啓迪青年濬其思潮嚮導之以入於世界觀俾舊文化與新文化相斲合於以發其光輝俾吾國前途足與於世界強國之列而無少遜色則讀君此集者常亦同茲祈嚮也夫

民國十七年六月林文慶序

序二

二

山川葱鬱之氣其孕于人也郁郁芬芬以昌其詩文寧一邑所能私哉惠宅螺岫之陽一瀕海小鄒魯也報劬聳翠西來陳郎中暇琬琰以之器焉折而北者圭峯實生希韓盧子迤東曰淨峯小山彙稿之所纂也負郭登科峯二崔復矣過盧徵君讀書處高士峯猶能耳熟者盤峯峨峨竊然南峙康公用晦文韜經武曹濮間頌聲未沫也乃凌夷數百禩英類靈悶傳而弗彰景止先芬傍惶曷極賀君告余曰舫之責也夫囊括其筆區以馳騁一世儒其學景其教出與中西人士游旁行斜上之才因明之理治夫道書釋部罔不究心遠而歐美名都近而亞陸登晉未遍臥遊悉之殆所謂讀書萬卷吞若雲夢八九於其胸中者故其發而爲文曄然而高華粲然而名家其爲詩也涵泳春容出入于兩宋三唐不似今人之主奴一代嗚呼盛己余前讀君集拜而序之公然弁諸卷首心滋慙焉今別君白鷺洲邊瞬經兩載當故鄉兵燹文獻就燬君又俎豆唐宋元明諸先正以一脈祧之戰衆舌之嘷嘷珍孤修於片羽茲集不脛而走令不薄今人者進而崇拜古人陳盧張康所留遺之斷簡他人有志邏輯力苦未逮君以洞天翰墨餘瀋附庸而表章之當有出山崖而公大陸之一日昌黎不云乎爲之後焉休光能照是又余耿耿此心望古遙集者爾是爲後序戊辰八月同邑弟汪煌輝序于南華女中學校

序三

丙寅賀子仙舫出繡鐵齋叢集第一集余讀之見其散駢文古近詩及詩餘墨餘均有先賢矩矱對此歐風美雨萍溲東來獨能砥柱中流不逐風潮以俱湧新學輩有斯文字已嘆爲方回再世吾邑先正典型未墜宜紙貴洛陽矣茲復整理新舊著爲二集而重付鉛槧以弁言告余余曰君集自成一家言原有可傳不必藉品題而聲價能漲鄭板橋有集不乞人以叙其意職此况君學與年晉前集已盡美再集亦盡善當世名公巨眼早定奚俟余贅然余思之晚近作者棟充牛汗大都獵豔標新求其思想今步趨古不泥俗而老嫗皆解者卒鳳毛麟趾焉君家自唐季真詩鳴後宋方回著有慶湖遺老集並詞二卷流傳於世餘如漢公苗晉彥先明克繇等皆以政績顯而君不染鴛塵於鼓浪洞天中欹枕雨夢隔簾春心闡發古今之祕笈真是泉脈離根裏替人也卽若吾邑鄉先正以詩集著者盧子圭峯黃子吾野以文集著者張公淨峯賂公台晉自元而明著述如林猶少以詞名噪至唐陳比部宋黃才子等雖有遺著而散佚者多有清一代文名如盧子瑞峯而其集不見僅有孫子惕齋經說蘭陔歸田稿付梓以傳著作一家談何容易也入民國來山林者病晦僻貴族者病揄揚古典者病隱奧社會者病俚俗公諸同好此道益稀君今精心結構著作等身有規有則相繼續刊朽與不朽固未敢知而於邑先正竊謂後先媲美焉戊辰八月同邑杜唐印陶氏序於英華書院

題詞

題詞

馳驅文囿少年場。傾倒金壺墨汁香。漢世茂材稱異等。閩川名士記連牀。「菽莊吟社唱和忽忽八年矣」箋銜燕子烏衣國。血嘔蛇神古錦囊。何處鑑湖煙水闊。讓君南面作詩王。

南嶽傲樵初稿

乾坤何代尚吟詩。休謂春蠶作繭癡。萬斛騷愁銷綺業。三年鐵網長珊瑚。曹碑黃絹成佳話。（曾見君所作林桂舟謎叙心交十年乃得把臂）賀監青蓮是舊知。花港一春艱覲面。思量題句慰聯離。（用黃公度題易實甫魂南北集原韻）

繡伊弟李禧未是稿

當世儒宗亦彥先。交成文字契三年。「丙寅曾和弟五十感懷詩及叙惠安古蹟新詠」不因沈約聲增十。豈假相如價重千。車似牽鹽傷驥老。經休覆醬誚烏玄。若論酒性方詩品。第一還推冠八仙。

杜印陶

吾家臺沼鑑湖濱。文藻知章有替人。亂後賜榮荒小築。管城花落隔江春。出奴入主費沈吟。得失千秋一寸心。大宙珠光已塵土。買詩無價到雞林。燒薪覆甌此生該。那有名家是作才。飽付鰥魚仙去好。裝池也省棗梨災。

浪夸纖字抵歌綾。作述名山有繼承。風雅南朝誰庾信。只今片石出韓陵。

鄭吟弟汪煌輝

一代詩書兩率更。君傳家學擅詩名。嗟予未得詩三昧。只有耽書寫九成。

張聿初稿

社侶推君久。琅琅大雅詞。「借句」懸知君腕健。工筆又工詩。

平易師長慶。風流嗣季真。十年親譬欬。珠玉徧江濱。

丹初陳桂琛初稿

鑑湖文章世所好。文有奇氣詩雅奧。上追秦漢沿六朝。擷精摘藻有獨到。擲地鏗鏘金石聲。鶯門壇坫多傾倒。笑他頽宋靡靡音。半山小谷徒僭號。吁嗟乎黃鐘毀棄爭瓦鳴。歸昌寂寞羣蟬噪。願藏名山傳其人。會看采風作典誥。

海澄江煦初稿

繡鐵盒叢集集之第二目次

序言

一

題詞

四

文

三十篇

一

詩

古近體二百三十二首

四十三

墨餘

五十二則

七十五

新學堂
PDG

繡鐵盒叢集

集之第二

螺陽賀仲禹

文

主權篇

乾之彖曰。大哉乾元。萬物資始。坤之彖曰。至哉坤元。萬物資生。原夫二氣之流行。根於太極。而惟其有資始資生之德。夫而後能四時行焉而不謬。百物生焉而不失。山嶽峙焉而不遷。川澤渟焉而不漏。日月星辰懸焉而不墜。虫魚鳥獸。濡焉遊焉飛焉走焉而不駭。嗚呼。是實使之然歟。權也。是實主此權歟。介乾元坤元之大主宰也。大主宰操縱其主權。而乾元於以綱維。坤元於以臬宰。於是而萬物資始焉資生焉。此天地之所以爲不可思議。而主權之所以爲可貴也。

世界之大。萬物之多。圓其顙方其趾者人也。人也者。萬物之一。大主宰特任命之以君臨萬物者也。吾人既爲萬物之君。則大主宰之主權。勢不得不賦予吾人以操持。是故凡圓其顙方其趾者。自有生之初。至世界末日。無一不有其賦予之主權。如人之元氣。不可一日而無。不可讓人而有。人而不知受大主宰所賦予之主權而操持之者。自棄者也。操持之而不能堅毅耐久者。自暴者也。自棄自暴者。雖覩然而目。其實卽下等之動物。以其

文

一

暴業其固有之主權故也。獅虎之食息於蒼莽也。哮嘯一聲。羣獸爲之震懾。主權也。蛟鯨之潛泳於洋浸也。鰭鬣一揚。羣鱗爲之恐懼。主權也。準是言之。人而自暴自棄。曾動物之不若。夫人而至於動物之不若。則委靡選懦。頹弱孱荏。若而人者。以之修身則身覆。以之齊家則家敗。以之治國則國亡。彼奴隸牛馬之種族。低首佻倪之士夫。爲他人所刀砧魚肉。鞭撻唾辱者。率此類也。嗚呼。天下最可痛哭流涕長太息者。孰有甚於此者乎。是故杳杳冥冥之中。飄忽無定者權也。腦海磅礴。鉄血奮鬥。搏擊飛舞。腥風肉火。犧牲無量數之生命財產以相馳逐而不顧者。惟爭此可愛可敬可驚可愕之主權耳。其始也。甲與乙爭。甲而勝也。則甲爲握乙之主權而役使之。其繼也。甲部落與乙部落爭。甲部落而勝也。則甲部落爲握乙部落之主權而併吞之。又其繼也。甲國與乙國爭。甲國而勝也。則甲國爲握乙國之主權而割据之。優勝劣敗。天演公例。無古今中外一也。惟是太古之世。人類以游牧爲生涯。其所爭之主權僅僅耳。其後之狡而黠者。所見略大。於是出而驅策其較弱之人類。組合爲一部落。顧其所爭之主權。亦一牧場之尋尺地耳。又其後之更狡而黠者。所見更大於是出而合併其較弱之各部落。組合爲一國。自時而降。愈演愈進。遂至於曰皇曰帝。無上威權。顧其所爭之主權。亦惟是東半球者惟東。西半球者惟西耳。方斯時也。爵祿可以示其恩。鈇鉞可以震其威。言而莫予違。行而莫余禁。生死予奪。惟一人之權是尙。下此者。則俯首聽命耳。拜跪稱臣耳。天子聖明。臣罪當誅耳。嗚呼。此豪梟之

徒之所以力爭天下之主權。以爲一人一家之主權。而君權之所由起也。是固爲主權史上之絕大墜落。而爲人類之日陷於下等動物之恥辱時期也。歲改月移。吾民亦渾然噩然。幾莫知權之所宜主。遂至令一國之權。惟強有力之君主主之。彼亦習爲固然。恬不爲怪。考之吾國史乘。已四千餘年於茲矣。萬劫不復。不亦大可哀哉。

二十世紀之世界。一主權磅礴之世界也。民智開而風氣乘除。時機熟而運會推遷。無論智愚賢不肖。倘非甘於自暴自棄。而下儕於下等動物者。蓋無一不奮臂攘襟。躍然而起。爭欲一握此大主宰所賦予之主權而後快。於是羣起而奪一人之主權。還諸國民。以天下人之天下權。而天下人公主之。所謂專制君主之國家。不能成立於二十世紀之時代者。正謂此也。夫然。今日之所謂國家者。其權既不屬諸君主。而屬諸民主。則一國之主權。惟其一國之國民。得專而主之。他國之人。固莫能與之爭。使他國之人。稍有侵及其一國主權之萬一者。其國民必羣起而竭力爭之。爭之不得。繼之以死。前仆後繼。不少退讓。蓋一國之主權。斷不容予他國之人以有所干與。他國之人。一有干與其國之主權。則其國之國民。已墜入於下等動物之畜道。毋寧一死之爲愈。卽一死。猶不足以洗主權被侵之恥辱也。嗚呼。世界之所以日益進化。而至於令人不可思議者。是皆此一念之動機耳。豈不大可異哉。

雖然。吾思之。吾重思之。一國之主權。得失存亡。在於國民道德智識之高下優劣耳。

道德智識及十之一者。其主權卽得十之一。及十之十者。其主權卽得十之十。今吾國民之道德何如。智識何如。吾亦國民之一份子。而握此大主宰所賦之公共主權者。吾思及此。吾不忍言。而亦不容不言。不得不言。吁嗟乎。吾試放吾眼光。四顧吾國四萬萬國民之道德之智識。去於吾所謂主權者。當不知其幾千萬里。夫吾國民去其主權。既如斯之遠。是我國民自行放卸其主權。而不之惜矣。吾既放卸其主權而不之惜。則彼視耽耽而欲逐逐者。方將染指於其後。而代握吾國之主權矣。吾國主權墜而爲吾國人所拾。如專制時代之王綱解紐。梟雄者取而代之。南面臨軒。君主易姓。目前雖作亡國之遺民。而日後尙有革新之希望。若夫吾國主權墜而落諸非吾國人之手。則黃炎衣冠。淪於皂隸。神明種族。降作輿臺。卽歌離弔夢而不能。斷停食息而不得。甚而死無葬身之地。埋骨之區。如印度波蘭朝鮮台灣。殷鑒不遠。詎不予吾人以可畏耶。

且夫權之爲物。視之無色。聽之無聲。嗅之又無臭味。其得之也。至艱且巨。其喪之也。至輕且易。而其所以主之。使之不至於墜落者。亦惟持守一國之土地人民政事耳。土地保而不至於侵削。人民安而不流於窮困。政事行而不入於昏迷。則主權之勢力。自能擴張其範圍。否則土地不能保。而爲人所鯨蠶。人民不能安。而輾轉於溝壑。政事不能行。而顛倒於麻木。滿清君權之所以墜落者。職是故耳。清既墜落。民國拾之。則今之主之者。實吾國民。吾國民而能保吾土地。安吾人民。行吾政事。則是吾國民能主其

主權也。吾國民而不能保吾土地。安吾人民。行吾政事。則是吾國民不能主其主權也。吾國民不能主其主權。則此璀璨光榮。寶貴無倫之河山。爲他國人所垂涎側目。萬求而不可得之主權。將誰拾而代之乎。嗚呼。是非吾所忍言已。

審是。則吾國民而不脩明其道德。以底於馴正。啓淪其智識。以至於精深。則權終不可得而主。及至舉一國之主權。盡墜落於外人之手中。然後方知剝床切膚之痛。而大聲疾呼。冀救危亡於萬一。已悔噬臍而莫及矣。恫哉。

輿論

輿論者國民之喉舌。而爲一種潛勢力。以維持社會。輔導國家者也。其始也。往往一夫倡之。百夫和之。久而瀰漫於十百千萬人之口中。而莫可遏阻。此其至剛至堅之質。爲烈火所不能燬。巨浸所不能沈。雖賢智之士。強悍之夫。亦不得不屈伏於此一種潛勢力之下。而不敢有所鳴張。甚矣哉。輿論勢力之偉且大也。孫公中山邀譙滬上報界。其演詞之結論曰『輿論之力。較武力爲大。而使國民咸知共和真理。不容許武人官僚亂國。尤非輿論界努力不爲功』富哉言乎。吾國輿論界當亦知所自重。而力以維持社會。輔導國家爲職責。然後爲不愧也。

夫所謂輿論者。公理之所發揮也。公理之在兩間。猶水之在地上。無處無之。而百磨不

破。百折不撓者也。吾人良心上之所發現。理性中之所賦稟。無一非純正之公理。則其所發揮者。自無一非純正之輿論。故與其謂輿論爲倡於一夫。無甯謂倡於羣衆。蓋公理之瀾漫兩間。固非僅厚於一夫。而實普遍於羣衆者也。是以以羣衆所擁護之公理。而發揮羣衆所發表之輿論。斯輿論不至偏頗。而常處於自動之地位。則其潛勢力之所支配。較之武力。其偉大豈止倍蓰。

雖然。今日所謂輿論者。果羣衆所擁護之公理否耶。果不偏頗而常處於自動之地位否耶。其勢力之偉且大。果倍蓰於武力否耶。凡茲種種。吾人不能無疑。良以私理勝則公理亡。利慾薰蒸。則自動力損失。武力萬能。則輿論力退敗。由是而公理終不能光大於社會國家之上。武人官僚。自明目張膽。無所忌憚。是純正之公理。一失其擁護。而國民之喉舌廢。而武人官僚之罪惡成。而社會國家之安甯之幸福。亦隨之而汨沒無餘矣。言念及此。怒焉心傷。此余所以味孫公之言。而不敢不與主持輿論諸君子交勉之也。

崇儉

吁嗟乎。今日社會。一奢靡浮華之社會也。風氣所趨。貧者見富者而效之。富者見尤富者而又效之。樓屋之金碧輝煌。衣服之錦繡羅綺。飲食之珍羞濃膩。以及日用之侈。應酬之豪。蓋不特一飯十金。一衣百金。一室千金已也。即較之古今所侈談之石崇何曾輩。

猶什百千萬而未止也。習俗薰蒸。輾轉日甚。國家安得而不貧。民生安得而不困。人格安得而不墜。國奢示儉。良有以也。顧以今日而言崇儉。鮮有不笑爲迂闊者。不知君子持躬處世。治國平天下之道。胥於此是務。論語言足食。大學言生財。孟子言菽粟如水火。管子言衣食足而知禮義。皆儉之繫於治平者也。蘇東坡在黃州。每日以百錢懸於樑間。祇許有餘。而不使不足。司馬光歷舉儉德。以訓其子康。李文炤訓勸。而繼之以訓儉。皆足以矯正末俗。挽回奢風。而繫於持躬處世者也。彼笑爲迂闊者。蓋亦不思之甚耳。夫天下之大禍。莫甚於多慾。人心之大惡。莫尤於營私。多慾則多求無厭。而廉恥斲喪。營私則貪取賄盜。而奸宄橫生。由是則賣國殘民而不恤。殺人越貨而不顧。詐欺詭求而不耻。推其禍惡之端。不儉肇之也。曾滌生曰。風俗之厚薄。自乎一二者之心之所嚮而已。吾恐不能儉。無以止禍去惡。而厚風俗。故取而崇之。

黜私

德之最敗者。莫若私。事之易誤者。亦莫若私。蓋人壹懷私見。挾私心。則私之一念。橫據胸中。斯舉所謂利害禍福。均昧焉罔察。縱有忠告而善導之者。彼亦自以爲是。而以他人之言。爲不足取信。率意孤行。一往不反及私見私心。既盤據牢固。則狐疑之念。卽隨之而生。於是由無事而有事。由小事而大事。庸人自擾。此之謂也。且也懷私見挾私心

者。不特不自知其非。力圖懺悔。抑且善於假公濟私。以周內羅織爲能。以吹毛求疵爲慧。彼不知者。見其所爲。靡不稱許而贊嘆之。以爲某也賢。某也公。殊不知其所爲者。爲一黨一系之所利用。以圖快其一己之私而已。烏覩其賢與公哉。然此輩之所爲。僅足以欺罔庸衆。而君子則如見其肺肝然。將何益哉。作僞心勞日拙者。可以返矣。武氏之言曰。與我善者。我稱之爲善人。與我惡者。我稱之爲惡人。今日之懷私見挾私心者。亦復如是。惟不肯如武氏之直捷說出耳。嗚呼。此私見私心者之巧於文飾。工於掩護。所以日甚一日。人反莫知其私。而以之爲賢且公也。夫微危之旨。君子所引以自守者也。良以世風不古。人心陷溺。私心勝則公義亡。私見充則人慾熾。我國國勢所以日瀕於危殆者。蓋皆私之一念之爲厲耳。此余所由有感於中。而不能自己於言者也。邦人君子。當不以其迂而忽之也。

新歲月與新生命

積若干之刹那。而成歲月。積若干之細胞。而成生命。過去之刹那。爲舊歲月。方來之刹那。爲新歲月。已往之細胞。爲舊生命。現在之細胞。爲新生命。吾人處生命於歲月之中。歲月無時不新。而生命則有時仍舊。是生命終莫得與歲月俱新。藐茲七尺。徒爲細胞變化之器。以食息於宇宙之間。心爲形役。志以慮昏。可不大哀乎。